

歷代儒學存真錄

新平知

知學

PDG

歷代儒學存真錄卷九

蘇門郭程先雪齋先生定

浚儀田攸乙亭輯

明

薛瑄字德溫山西平陽府河津縣人祖仲義通經史
值元亂教授鄉里不求仕進父貞洪武初領鄉薦
爲真定元氏教諭母齊氏夢紫衣人謁見己而生
瑄初誕肌膚如晶五臟洞見家人怪之欲不舉祖
聞其啼聲曰非常兒也乃舉育之性穎敏甫就塾
授之詩書輒成誦日記千百言年十二以所作詩

賦呈監司監司奇之旣而聞高密魏希文海甯范
汝舟深於理學貞乃並禮爲瑄師由是盡焚所作
詩賦究心洛閩淵源至忘寢食後貞改官鄆陵瑄
補鄆陵學生永樂十八年庚子遂舉河南鄉試第
一辛丑成進士以省親歸居父喪服除擢授御史
出監湖廣銀場日探性理諸書學益進尙書郭璫
舉爲山東提學僉事首揭朱子白鹿洞學規開示
學者延見諸生親爲講授才者樂其寬而不才者
憚其嚴皆呼爲薛夫子旣陞大理寺左少卿以王
振故退居景泰元年復起大理寺丞尋陞南大理

卿四年改北大理卿天順元年遷禮部侍郎兼翰林學士入內閣尋命主考會試已而以老乞歸瑄學一本程朱其修己教人以復性爲主充養邃密言動可法嘗曰自考亭以還斯道已大明無煩著作直須躬行耳有讀書錄二十卷行世河汾集藏於家天順八年六月十五日忽邁疾衣冠危坐而逝時風雷大作白氣上升卒年七十六世稱敬軒先生贈禮部尙書諡文清成化間國子監丞李紳宏治中兵科張九功俱請從祀隆慶五年允議從祀孔廟稱先儒薛子

見理學宗傳

陳獻章字公甫廣東廣州府新會縣人生而目光如
星儀幹修偉右頰有七黑子狀如北斗年二十舉
正統丁卯鄉試屢上禮部不第聞江右吳與弼講
伊洛之學往從之游遂棄其學而學焉居半載歸
築陽春臺讀書其中數年日夜不輟久之復游太
學名震京師給事中賀欽聽其講論卽日解官執
弟子禮事之旣歸四方來學者日進廣東布政使
彭韶總督朱英交薦召至京令就試吏部屢辭疾
不赴疏乞終養授翰林院檢討以歸隱居白沙其
學以靜爲主嘗言吾年二十七始從吳聘君學於

聖賢書無所不講然未知入處以歸白沙專求用力之方亦卒未得於是舍繁求約靜坐久之然後見吾心之體隱然呈露日用應酬隨吾所欲如馬之啣勒也其學灑然獨得論者謂有鳶飛魚躍之樂而蘭溪姜麟至以爲活孟子云宏治十三年卒年七十三稱爲白沙先生萬厯十二年追諡文恭從祀孔廟稱先儒陳子

見理學宗傳

胡居仁字叔心江西饒州府餘干縣人年十七受春秋爲舉子業聞吳與弼講學崇仁往從之游絕意仕進以古人自期斯道自任以記誦詞章爲不足

事其學以主忠信爲本以求放心爲要以聖學成始成終在於敬因以敬名齋鶉衣簞食晏如也四方樞衣來學者眾築室於梅溪山中語學則曰學以爲己勿求人知語治世則曰惟王道能使萬物各得其所著有居業錄蓋取修辭立誠之義每言卑者溺於功利高者驚於空虛其患有二一在所見不真一在功夫間斷不知操存省察爲何事安能造道德之域嘗作進學箴曰誠敬旣立本心自存力行旣久全體在仁舉而措之家齊國治能事畢矣言者謂居仁闔修自守布衣終身薛瑄之

後粹然一出於正一人而已卒年五十一世稱敬
齋先生萬歷十二年追諡文敬詔從祀孔廟稱先
儒胡子

見理學宗傳

王守仁字伯安浙江紹興府餘姚縣人父海日公華
舉進士第一授職修撰官歷南吏部尙書守仁天
姿異敏年十七謁上饒婁一齋諒諒故游吳聘君
康齋門者與論朱子格物大指還家日端坐講讀
五經不苟言笑二十一歲壬子舉於鄉入京徧讀
晦菴書爲格物之學署中多竹卽取竹一物格之
沉思不得至成疾遂自委聖賢有分且隨世就辭

章之學己未年二十八以禮經中會試第二授刑部主事壬戌告請歸越築室陽明洞中泛濫周程之學甲子三十三歲聘主考山東鄉試得人最盛調兵部主事正德元年劉瑾逮南京給事中御史戴銑等二十餘人守仁抗章救瑾怒廷杖四十謫貴州龍場驛丞窮荒無書日繹舊聞忽悟格物致知當自求諸心不當求諸事物喟然嘆曰道在是矣遂篤信不疑其爲教專以致良知爲主四年陞廬陵知縣五年陞南刑部主事六年調吏部歷遷郎中七年陞南太僕寺少卿九年陞南鴻臚寺卿

十一年授南贛巡撫十二年宸濠變作起兵勤王
獲濠獻俘封新建伯兼兵部尙書嘉靖六年征岑
猛黨因平八寨遇疾乞致仕行至南安卒年五十
七喪過江西軍民無不編素哭送者世稱陽明先
生著有傳習錄行世賜諡文成萬曆十二年從祀
孔廟稱先儒王子

見本傳

蔡清字介夫福建泉州府晉江縣人少從侯官林珙
學易盡得其旨舉成化十三年鄉試第一二十年
成進士卽乞歸講學於家已選禮部祠祭主事吏
部王恕重清調爲吏部稽勲司主事恒訪以時事

清乃上二札一請振紀綱一薦劉大夏等三十餘人恕皆納用除祠祭員外郎改南京文選郎中尋丁內外艱遂家居授徒不出正德改元卽家起江西提學副使宸濠驕恣不法清不欲苟合遂乞休歸劉瑾知天下議已用蔡京召楊時故事起清南京國子祭酒命甫下而清已卒時正德三年也年五十六其學初主靜後主虛故以虛名齋平生飭躬砥行貧而樂施爲族黨依賴以善易名嘉靖八年其子以所著易經四書蒙引進於朝詔爲刊布萬厯中追諡文莊贈禮部右侍郎

國朝雍正

二年增祀孔廟

見本傳

呂坤字叔簡河南歸德府甯陵縣人質稍鈍讀書不能成誦苦訓詁家言亂之益不能解坤乃一切棄置澄心體認本旨久之了悟入目卽不忘年十五讀性理諸書欣然有會作夜氣鈔擴良心詩隆慶辛未成進士萬曆甲戌授襄垣令有惠在民調知大同時有以人命坐抵其姻王家屏係鄰邑大紳向坤言之答曰獄已成不可反嗣家屏任吏部與僚友曰天下第一不受請托無如大同令也特疏薦坤陞吏部主事在部十年七轉郎署出歷濟南

參政按察山西右藩陝西旋陞山西巡撫上憂危
疏優詔答之所至皆正己率屬務致實行餽遺贖
羨盡杜絕之尤加意蒙養孤嫠無依者值天下將
多事更嚴邊防定有成法陞協理院明年調刑部
右侍郎尋轉左侍郎在京四年不合於眾惡之者
中以奇禍舉朝皆危坤不辯引疾乞休家居四十
年自奉儉約不置生產惟日與門弟子講論不輟
有負笈自千里來者咸推沙隨夫子云所著家禮
翼家禮疑去僞齋文集閨範集呻吟語安民實務
交泰韻等書年八十三卒於家晚稱新吾先生贈

刑部尙書賜祭葬

國朝道光六年增祀孔廟

見本傳

羅欽順字允升號整菴江西泰和縣人宏治六年進士及第授編修遷南京國子監司業與祭酒章懋以實行教士未幾奉親歸因乞終養劉瑾怒奪職爲民瑾誅復官遷南京太常少卿再陞南京吏部右侍郎調左侍郎世宗卽位命攝尙書事大禮議起欽順請慎大禮以全聖孝不報遷南京吏部尙書改禮部尙書會居憂未及拜再起禮部尙書辭又改吏部尙書下詔敦促再辭許致仕有司議給

祿米時張璫桂萼以議禮驟貴秉政樹黨屏逐正
人欽順恥與同列故屢詔不起里居二十餘年足
不入城市潛心格物致知之學時王陽明以心學
立教才智之士翕然師之嘗致書陽明辨論格物
致知正心誠意之學反復數千言其學專力於窮
理存心知性初由釋氏入既悟其非乃力排之謂
釋氏之明心見性與吾儒之盡心知性相似而實
不同釋氏之學大抵有見於心無見於性今人明
心之說混於禪學而不知有千里毫釐之謬道之
不明將由於此欽順有憂焉著有困知記年八十

三卒贈太子太保諡文莊

國朝雍正二年增

祀孔廟

見本傳

劉宗周字起東號念臺浙江山陰人萬曆辛丑進士授行人上疏言國本言東林多君子不宜彈射請告歸起禮部主事劾魏忠賢保姆客氏轉光祿寺丞尋陞尙寶少卿太僕少卿疏辭不允告病回籍起右通政又固辭內批爲矯情厭世革職爲民崇禎己巳起順天府尹上方綜核名實羣臣救過不遑先生以爲此刑名之術也不可以治天下而以仁義之說進上迂濶之上疑廷臣謀國不忠稍稍

親向奄人先生謂今日第一宜開示誠心爲濟難之本皇上以親內臣之心親外臣以重武臣之心重文臣則太平之業一舉而定矣用爲工部左侍郎三疏請告上允之壬午起爲吏部左侍郎先生以爲天下治亂決不能舍道而別有手援之法一涉功利皆爲苟且途中上書以明聖學未至陞左都御史召對上問職掌安在對曰都察院之職在於正己以正百僚必其存諸中者上可以對君父下可質天下士大夫而後百僚則而象之至於責成巡方其守務也巡方得人則吏治清吏治清則